


PEMIKIRAN BAHARU

Utusan Malaysia



Belanjawan Madani

Oleh YULPISMAN ASLI
yulpisman.asli@mediamulia.com.my

PETALING JAYA: Pendidikan, kesihatan, keselamatan sosial, kemiskinan tegar, kemantapan ekonomi dan pembangunan infrastruktur kritikal mendapat perhatian paling besar dalam Belanjawan 2023 yang dibentangkan Datuk Seri Anwar Ibra-

Belanjaan 2021 MALAYSIA MADANI

him semalam.

Sektor pendidikan menjadi penerima dana terbesar membatik peruntukan RM55.2 bilion yang akan menyaksikan lebih

380 sekolah daif tanpa mengira aliran akan dipulihkan yang akan memastikan kualiti pembelajaran ratusan ribu pelajar.

Kerajaan Perpaduan juga memperuntukkan RM36.3 bilion untuk sektor kesihatan yang sebelum ini dibelenggu masalah kekurangan jawatan doktor tetap dan kemudahan yang uzur.

Menerusi belanjawan yang

dibentangkan, 1,500 perjawatan tetap doktor, pergigian dan farmasi akan diwujudkan tahun ini membatik peruntukan RM3 bilion.

Ini adalah pewujudan jawatan pegawai perubatan tetap teramai pernah dilaksanakan kerajaan. Beberapa hospital dan klinik juga akan dinaik taraf bagi menangani masalah kesesakan

di pusat rawatan milik kerajaan di seluruh negara.

Menteri Kewangan juga mengumumkan usaha besar 'menoktahkan' kemiskinan tegar yang membatik 130,000 rakyat termasuk memberikan latihan dan peluang menjana pendapatan yang lebih tinggi.

Bersambung di muka 3

Belanjawan Madani

Dari muka 1

Kerajaan juga memperuntukkan RM64 bilion dalam bentuk subsidi, bantuan dan insentif bagi menangani kos sara hidup yang tinggi yang ditanggung rakyat sejak tahun lalu.

Belanjawan 2023 membabitkan RM388.1 bilion merangkumi RM289.1 bilion untuk perbelanjaan mengurus dan RM99 bilion bagi pembangunan, peruntukan terbesar dalam sejarah 65 tahun negara ini.

“Peningkatan ini adalah untuk menumpukan program membasmi kemiskinan, baik pulih prasarana awam dan kemudahan desa. Dengan pembaharuan tatacara perolehan kerajaan, akan dipastikan perbelanjaan tambahan ini dimanfaatkan sepenuhnya untuk kepentingan rakyat,” kata Anwar yang menerajui Kerajaan Perpaduan selepas Pilihan Raya Umum Ke-15 November lalu.

Dalam ucapan belanjawan selama kira-kira dua jam, Anwar juga memberi amaran mengenai hutang negara yang mencecah RM1.5 trilion termasuk liabiliti, ketirisan dan rasuah selain tatakelola yang tidak terurus sehingga negara berada dalam kemelut kewangan ketika ini.

Katanya, kerajaan pimpinannya bertekad membaiki sistem pentadbiran dan memastikan



ANWAR Ibrahim ketika membentangkan Belanjawan 2023 di Parlimen, semalam. - JABATAN PENERANGAN

pengurusan negara akan dapat dipulihkan, memacu ekonomi yang terangkum dan mampan, reformasi institusi dan tatakelola bagi memulih keyakinan dan keadilan sosial.

Anwar juga menegaskan belanjawan itu adalah cerminan prinsip pertanggungjawaban dan sistem nilai yang luhur, yang mampu mendepani tantangan semasa termasuk tantangan ekonomi global yang sarat dengan ketidakpastian.

“Biarpun ada yang berbeza pandangan politik jangan kita

biarkan perbezaan itu menghindar kita daripada melakukan perubahan yang bermakna,” katanya yang meletakkan hala tuju pentadbirannya yang berusia 100 hari itu.

Belanjawan 2023 dijangka dibiaya kutipan hasil berjumlah RM291.5 bilion, pertumbuhan ekonomi sekitar 4.5 peratus berbanding unjuran Bank Dunia dan Fitch sekitar 4 peratus.

Katanya, kerajaan mengurangkan defisit fiskal kepada lima peratus ketimbang 5.6

peratus pada 2022 dan menyasarkan 3.2 peratus kepada Keluaran Dalam Negara Kasar (KDNK) menjelang 2025.

Isu keterjaminan makanan turut mendapat perhatian Perdana Menteri, dalam mendepani tantangan kenaikan harga barangan dan gangguan bekalan makanan di mana kerajaan akan menggalakkan pelaburan swasta berasaskan pertanian berskala besar. Sabah dan Sarawak masing-masing menerima RM6.5 bilion dan RM5.6 bilion.

Kementerian berkaitan keselamatan negara, Kementerian Dalam Negeri dan Kementerian Pertahanan diperuntukkan sejumlah RM18.5 bilion dan RM17.7 bilion bagi memastikan kedaulatan negara dapat dipertahankan terutama negara berdepan aset ketenteraan yang semakin uzur.

“Keutamaan peruntukan ini adalah untuk menyelenggara dan membeli aset-aset Angkatan Tentera Malaysia (ATM) bagi meningkatkan kesiapsiagaan pertahanan dengan peruntukan hampir RM4.1 bilion,” katanya.

Anwar juga mengumumkan pengecualian duti setem bagi pembelian rumah pertama bagi rumah bernilai RM500,000 ke bawah dan pengecualian duti setem 75 peratus untuk rumah bernilai lebih RM500,000 hingga RM1 juta.